



JUDICIAL SYSTEM MONITORING PROGRAMME  
PROGRAMA MONITORIZASAUN SISTEMA JUDISIÁL

## **Komunikadu Imprensa**

### **Parlamentu Nasionál**

**03 Dezembru 2015**

#### **JSMP realiza semináriu distritál kona-ba demokrasia no partisipasaun públika iha prosesu halo lei iha Suai, Covalima**

Iha 30 Novembru 2015, JSMP realiza semináriu distritál iha Suai, Munisípiu Covalima. Partisipante sira iha semináriu ne'e mai hosi xefe suku, membru konsellu suku no membru komidade hosi suku 10 hosi Postu Administrativu Suai, Maucatar no Tilomar ho totál partisipante na'in 43.

Oradór sira iha semináriu ne'e mai hosi Parlamentu Nasionál (PN), akadémika no sosiedade sivíl. Oradór hosi PN representa hosi distintu deputadu Agostinho Lay, Prezidente Komisaun G ne'ebé ko'alia kona-ba knaar PN iha halo lei, fiskalizaun no foti desizaun polítika. Oradór hosi parte akadémika, Universidade da Paz (UNPAZ) representa hosi Dr. Hipolito Moniz ne'ebé ko'alia kona-ba demokrasia no partisipasaun públika iha prosesu demokrátiku tuir prespetiva akadémika. Oradór hosi sosiedade sivíl, representa hosi JSMP rasik ne'ebé ko'alia kona-ba demokrasia no partisipasaun públika iha prosesu halo lei, fokus ba deskobrimentu sira.

Kestaun sira ne'ebé partisipante sira foti mak hanesan asuntu alterasaun ba Lei Nú. 3/2009 kona-ba lideransa komunitáriu no nia eleisaun. Xefe suku sira ejize atu halo sosializasaun kona-ba versaun alterasaun ne'e atu komidade sira mós bele hatene didiak.

Asuntu direitu ba rai no mós lei rai sai preokupasaun komidade sira nian. Partisipante sira kestiona kona-ba ema ne'ebé hela iha ema seluk nia rai no reklama nu'udar na'in ba rai ne'e no oinsa kona-ba timoroan sira ne'ebé halai ona ba Indonézia sira nafatin iha direitu ba rai ka lae. Pensaun vitalísia no mós lei kona-ba divizaun administrativa no ordenamentu teritóriu sai mós preokupasaun xefe suku no komidade sira nian.

Aleinde asuntu legál, asuntu sira seluk hanesan projetu irigasaun ne'ebé abandonadu hela no laiha kontinuasaun. Kestaun hirak ne'e foti hosi xefe suku Suia Loro no asuntu mane hola feto barak no hola feto so'e ne'ebé rezulta abandonu familiár ba oan sira no feen ho la'en ne'ebé fahe malu, oinsa fahe rikusoin ne'ebé iha.

Oradór hosi PN nian hatan ba kestaun sira ne'e ho di'ak hodi esplika kona-ba lala'ok no prosedimentu ezbosu lei sira ne'ebé pendente no razaun ba alterasaun lei sira ne'ebé iha vigór. Razaun ba altera Lei Nú. 3/2009 ne'e tanba haree ba interese nasional no xefe suku sira nian. Iha hanoin atu halakon tiha eleisaun suku, tanba Timor-Leste rai ki'ik no

eleisaun barak liu no konsellu suku mak sei hili xefe suku no bele mós fila fali ba sistema monarkia nian. Asuntu sira ne'e sei iha prosesu diskusaun.

Relasiona ho kestaun pensaun vitalísia, deputadu ne'e dehan katak iha tinan oin, sei iha possibilidade ba PN hodi haree no diskute kona-ba atu altera lei ne'e hodi hatun de'it ninia porsentajen, maibé la halakon, tanba pensaun ne'e prevee ona iha Konstituisaun.

Pakote Lei ba Rai sei pendiente, tanba PN presiza mós haree kona-ba lei ordenamentu teritóriu, tanba lei sira ne'e iha ligasaun ba malu no lei ba rai ne'e mós kompleksu uitoan.

Enkuantu kona-ba asuntu abandonu ba oan no fahe rikusoin, JSMP no oradór hosi akadémiku nian kompleta tan deputadu nia resposta katak ba kazu abandonu ne'ebé involve menor sei reprezenta hosi Ministeriu Publiku no ba kazu fahe rikusoin nian sei prosesu tuir lei sivil nian.

Partisipante sira mós rekomenda atu programa hanesan bele hala'o iha fatin sira seluk, liu-liu comunidade sira ne'ebé la dun hetan asesu ba informasaun.

JSMP agradese tebes ho prezensa partisipante no oradór sira nian, partikularmente prezensa deputadu nian iha semináriu ne'e.

JSMP hein katak ho fórum sira hanesan ne'e sei fornese referensia útil no real ba distintu deputadu sira atu posivel hodi inkorpora realidade no nesesidade comunidade nian iha proposta Orsamentu Jeral Estadu (OJE) ba tinan fiskál 2016 nian.

Tuir planu, programa ne'ebé hanesan sei hala'o fali iha Munisípiu Lautem, iha semana daruak fulan-Dezembu 2015 nian.

Programa ne'e realiza tanba hetan apoiu hosi Fundu Sosiedade Sivil, Gabinete Primeiru Ministru, hosi Governu Konstitusionál VI, tinan fiskál 2015.

Atu hetan informasaun kle'an liu tan favor kontaktu:

Luis de Oliveira Sampaio  
Diretór Ezekutivu JSMP  
Diresaun e-mail: [luis@jsmp.minihub.org](mailto:luis@jsmp.minihub.org)  
Landline: 3323883 / 77810637